

1JN

Ciyei piimai

¹ N woo bala mbiri bala a dwii yo wu twii ciyei piimai, du doo yake taa yau, wu yi nuu yo, yi ko yi nundi yiri, yi mwaanga yi wari yiri.

² Nuwa juku yiri piima bwii, yi ko yo, dingin tono yi nyii seedaki dwii yei, pero yi wasi mbir ciyei a dwii piima bu yaa matirwa, woo kem yi Kwiite, nuwa jukuyiro yo.

³ Yi wasigu mbiru yiri tu yi ko pero yi nuwai, dingin yi kasi bu ninga naapu yi yo. Naapu yiru koo kem yi Yamba Kwiite, yi Bol yo Yesu Masiya.

⁴ Yi boo bala mbiri tina palaka degdeg gaanggu yiru ba twangwa.

Pisu rangu

⁵ Tina ciyei du yi nuwai a bonggo Yesu Masiya yi sagu mbira min, Yamba twii rangu. Kumjila yaa bonggo yo kana banyina.

⁶ Ka yi ce min yi boo yi naapu yi yo, anda yi songma a kumjila, yi cegu leendu pero yi yaa tum jire wii.

⁷ Anda ka yi ning songma miringgu rangu, cika ku yo mwa a miringgu rangu, yi ninggu naapu yi buri yiri, pero tiima Yesu Bol yo, a car yiro a bonggo welemdi yiri mwa mwa.

⁸ Ka yi ce min yi ti bu ninggu welem ne, yi welenggu buri yiri, yi som bu jire.

⁹ Anda ka yi sar Yamba welemdi yiri, yo wu cimacima pero twang tu yo ce, para yiri wei sukom welemdi yiri, ba car yiro a bonggo wurangi yiri tu bwii mwa mwa.

¹⁰ Ka yi ce min yi ninga bu welem ne, yi de Yamba twii ba leendo, pero ciyei yei yaa miringgi yiri.

2

Yesu twii kalam yire

¹ Mba kwaraa muwa wa, n woo bala mbir tina palaka bu ning ya welem. Anda ka wu kangge ning welem, yi boo yi nere wu kala yiri wei a bonggo Kwiite, wii Yesu Masiya wu cimacima.

² Yesu yiri yei twii nii du yi kinggi pargu sukom welemdi, buri yo ne anda kana wono nere wu sima.

³ Ka yi ningi pongondi yi teering Yambai, too jukuyiro kin manggu yi som yo.

⁴ Kana we wu ce kin, <<N som Yamba,>> anda yaa ning pongondi yi teering Yambai, too baleendo, pero som bu jire.

⁵ Anda nere wu ning pongondi yi ciyei Yambai, wii yo kangman Yamba cimacima. Too kanda ku yi som wei min yi boo pisu naapu yi yo.

⁶ Kana we wu ce kin yo woo yi naapu yi Yamba, tagi ba ninga pisu cika ku Yesu Masiya ningau.

Teeri du puci

⁷ Basimba muwa bu n kangni wa, teeri du n bala mbiri dina, dina du puci ne. Tina teeri du milgai, du bu boo yi tono yake taa yau. Teeri du milga dwii, dwii du bu gacila bu nuwai.

⁸ Anda kana yito teeri du n bala mbiri do, do du puci, Masiya a jukiya kin teeri dina too jire, mba mwa bu jukiya yito. Dingin kumjila weenggu anda rangu wu manggu a swiigu buru.

⁹ Nere wu ce kin yo ningu pisu rangu, anda kwaa bagon yo wu ponggu, lama yoko woo ningu pisu a kumjila.

¹⁰ Anda nere wu kangman bagon yo, a ninggu pisu wu rang, yaa ku diinu wei bu kangga ba ninga welem.*

¹¹ Nere wu kwaa bagon yo a pisu pu rim, pero a songma a pu rim, som bu pu yo songmau, dingin kumjila a diina yoo kermo.

¹² N woo bala mbiri mba kwaraa,
dingin Yamba gacila para mbir sukom
welemdi mbiri dingin din Yesu.

¹³ N woo bala mbiri mba kwiimba,
dingin bu som yo wu yake taa yau.

N woo bala mbiri mba kwatimba,
dingin bu gwala dimbir Balaa Buwai.

N woo bala mbiri mba kwaraa,
Dingin bu som Kwiite.

¹⁴ N woo bala mbiri mba kwiimba,
dingin bu som yo wu woo yake taa yau.

N woo bala mbiri mba kwatimba
dingin bu boo yi dimbire,
pero ciyei Yambai doo pisu a miringgi
gaanggir mbiri
pero bu gwala dimbir ninga Balaa Buwai.

* **2:10 2:10** Lakargarindi su kanggi ce kin yaa tu diinu wei pma ba ninga welem.

15 Bu kangmani ya sima, yi kana yiringi tu miringgi yei. Kana we wu kangman sima, yaa kangman Kwiite.

16 Dingin mwa mwa yiringi tu miringgi simai, cika bu miyam buru, kana ca tu nundi suwi pero kasi, yi yiring tu diin nere lee dwii, too yaa baangai bonggo Kwiite anda twiyongoi sima.

17 Sima yi miyandi yei mwa mwa matir wei, anda kana we wu ning tu Yamba kasi sii wei kana pene pene.

Dikacene a dwii bacemba Masiya wa

18 Kwaraa muwa, tina daandi su cwata goroi, cika ku bu gacila bu nuwa kin, bacen Masiya woo baayi, yoko bacemba Masiya tum a gacila baanga. Too tono yi soma min yi boo daandi su cwata goroi.

19 Pma bu bagu ceri yi Masiya boo cudi yiri nang, anda pma twiyongo cudi yiri, bwii boyiwa ne. Kana pma boo boyiwa wei, lama yoko na boo kem yi yo. Anda pma duu yiro, too jukiya kin pma boo boyiwa ne.

20 Anda mba, Masiya nyii mbir Bawei du Walwal, dingin tono mwa mwa mbiru bu som jire.

21 N bala mbira dingin bu som bu jire ne, anda dingin bu soma, pero bu soma jire yaa biri leendi.

22 Wu yi leendi wii we? Wii wu kwaa kin Yesu wii Masiya ne. Nere wu kwaa Kwiite yi Bwiya, wii yo bacen Masiya.

23 Kana we wu kwaa Bwiya, a kwaa Kwiite. Anda kana we wu lee Bwiya, a lee Kwiite.

²⁴ Mba bu du tu bu tilanga yake taa yau ba si siyau a gaanggu mbiru. Ka bu ning yito, bu ning wei naapu kem yi Bwiya yi Kwiite.

²⁵ A bonggo koo naapu, Masiya ninga yir alka-wal yo nyii yir wei piima bu yaa matir wa.

²⁶ N bala mbiri tina a dwii pma bu kasi ba ciyo mbira wa.

²⁷ Anda mba, Masiya a nyii mbir Bawei du Walwal du doo miringgi mbiri, dingin tono bu kasi ya kulum wu kanggi tweeyei. Dingin Bawei juku mbir kana ca, yiringi tu juku mbiri twii jire, twii leendi ne, dingin tono bu je gawure yi ninga naapu a miringgu Masiya.

²⁸ Kwaraa muwa wa, bu ninga pisu naapu kem yi Masiya, palaka yi nuu yaa gwas kana melma a gawuri yei nyanggu ku waata wau.

²⁹ Ka bu soma min Masiya cimacima, bu somu wei min kana we wu ning tu cimacima twii bol Yamba.

3

Kwaraa Yamba wa

¹ Bu suwa kanda ku Kwiite kang yiro wang, ku nuwa yi yiri kin yi kwaraa Yamba wa. Too tu yi yoogi. Too tu diinai nuwa bu sima wa som yiri bu, dingin pma som bu yo.

² Basimba muwa bu n kangni wa, yoko yi yoogi kwaraa Yamba wa, bo yi som bu tu yi yoo wei. Anda yi soma min ka Yesu waatai, yi yoo wei cika yo, dingin yi kwee wei yo cika ku yo yoogi.

³ Kana wono nere wu woo yi koo manam niuu yi Yesu Masiya, sii walwal cika ku Masiya walwal.

⁴ Kana wono nere wu ning welem a yer teeri Yambai, dingin welem twii yerigu teeri Yambai.

⁵ Bu soma min Masiya baa dingin ba deman siyau welemdi yiri, pero a bonggo you, yo yaa welem.

⁶ Dingin tonon kana wono nere wu pisu a miringgu Yesu Masiya yaa jee gawure yi ninggu welem. Kana we wu je gawure yi ninggu welem yaa ku tij kogu you pero som bu yo.

⁷ Kwaraa muwa, kana we ba ciye mbir ya! Kana we wu tum tu cimacima twii nere wu cimacima, cika ku Yesu Masiya yo cimacima.

⁸ Kana we wu je gawure yi ninggu welem wii wu Balaa Buwai, dingin Bala Buwai ning welem yake taa yau. Bol Yamba baa miringgi sima dingin ba woo siyau wurangi Balaa Buwai.

⁹ Kana we wu twii bol Yamba, yaa jee gawure yi ninggu welem, dingin piima bu puci bu Yamba wa boo miringgu yei. Yaa ku jee wei gawure yi ninggu welem dingin yo twii bol Yamba.

¹⁰ Tinaa nyindi su nuwa kurani kwaraa Yamba yi kwaraa Balaa Buwai wa. Kana we wu ning yiri tu yaa cimacima, twii bol Yamba ne, pero nere wu yaa kangman bagon yo, twii bol Yamba ne.

Bu kangman buri mbiri

¹¹ Tinaa ciyei du bu nuwai yake taa yau, yama yi kangman buri.

¹² Yi yoo ya cika Kayinu, yo wii wu Balaa Buwai pero dong a ji bagon yo Abila. Dingin ca a ji bagon

yo? A jiyo dīngin wurangi yei twii tu bwii anda wurangi bagon yei twii tu nyaayi.

¹³ Ciyamba, bu riyani ya buri ka nuwa bu sima wa kwaambiri.

¹⁴ Anda yo, yi soma min yi yeri boore yi baanga bonggo piima dīngin yi kangman kiyaa yuwa. Nere wu yaa kangman kappima, lama yoko woo kuu booru.

¹⁵ Kana we wu kwaa bagon yo, twii nere wu laci nuwa. Pero bu soma min yaa nere wu laci nuwa wu yi piima bu yaa matir wa.

¹⁶ Tinaa nyinou wu yi som kanda ku kangam yi tonou, Yesu nyii piima ya dīngin yo, yito mwa a daaya yi nyii piima yiwa dīngin kiyaa yuwa.

¹⁷ Ka nere wu yi gina kwee bagon yo yi biiki anda kalan bu ne, ba soma kin yo yaa kangam Yambau.

¹⁸ Kwaraa muwa yi jukuri ya kangam yi cewi yi ben tibak, anda yi juki kangam a bonggo wurangi yi jire.

¹⁹ Ka yi kangman buri yi soma min yo yi yoogi bu jire wa. Pero yi tindi wei tiyau a gawur Yamba yaa gwasi.

²⁰ Kana ka gaanggu yiru nyaa yiri dwii welemdi yiri, yi soma min Yamba a gwala dimbir gaanggir yiri pero a som kana ca.

²¹ Anda basimba muwa bu n kangni wa, ka gaanggu yiru nyaa yiri bu ne, yi tindi wei tiyei a gawur Yambai yaa gwasi.

²² Pero kana ca tu yi senggo a bonggo you yi kinggi wei, dīngin yi ning pongondi yi teering yei,

pero yi ning tu diraman yo gaanggu.

²³ Pero Yamba nyii yir teeri kin, yi lee jire yi Bol yo Yesu Masiya, pero yi kangman buri yiri, cika ku Yesu Masiya sa yiro yi ninga.

²⁴ Kana we wu ning pongondi yi teering Yambai, sii kem yi Yamba, Yamba mwa sii kem yi yo. Bawei du Yamba nyii yiro a diina yi soma min yo sii kem yi yo.

4

Bawei jirei yi du leendi

¹ Basimba muwa bu n kangni wa, bu lee ya jire yi kana wono wu ce kin yo woo yi Bawei Yambai, anda bu cuu pma. Yikwii bawei pmai baa bonggo Yamba ru? Dingin banabindi leendi wa a twiyongo kana piyau a sima.

² Tina nyinou wu yi kurani wei min nere woo yi Bawei Yambai, kana we wu lee kin Yesu Masiya baa miringgi buri, woo nere woo yi Bawei Yambai.

³ Anda nere wu lee bu yito a dwii Yesu, yaa Bawei Yambai. Bawei du woo yi tonoi dwii du bacen Masiya, bu nuwa kin baa wei, yoko a gacila baa, a miringgu sima.

⁴ Kwaraa muwa, mba bu yoogi bu Yamba wa, bu gwala dimbire banabindi leendu wa, dingin Bawei du miringgi mbiri a gwala bawei du nuwa bu sima wa.

⁵ Pma bwii bu sima wa, dingin tono kana ca tu pma cegu twii tu simai, pero nuwa bu sima wa nuu pma.

⁶ Anda yi yoogi bu Yamba wa. Kana we wu som Yamba kar twiyau yi yo, anda kana we wu yaa yoogi wu Yamba yaa kar twiyau yi yo. A bonggo yi to yi som nere wu yi Bawei du jirei yi du leendi.

Yamba kangam

⁷ Basimba muwa bu n kangni wa, yi kangman buri, dingin kangam baa bonggo Yambau. Kana we wu jukur kangam twii bol Yamba pero a som Yamba.

⁸ Kana we wu yaa jukur kangam som bu Yamba, dingin Yamba twii kangam.

⁹ Tina kanda ku Yamba juku yir kangam you, a tumuwe Bol yo yi wundu a miringgi sima, palaka yi nyingga piima a bonggo you.

¹⁰ Tina kanda ku kangam yi tonou, bwii bu yo yi kangman Yamba ne, anda yo kang yiro a tumwe bol yo palaka ba yoo nii dingin pargu siyei sukom welemdi yiri.

¹¹ Basimba muwa bu n kangni wa, yake ku Yamba kang yiro ko, tagi yo mwa yi kangman buri yiri.

¹² Yaa wu tii kogu Yambau, anda ka yi kangman buri, Yamba ninggu naapu yi yo, pero kangam you twangwa a cudi yiri.

¹³ Yi soma min yi ninggu naapu kem yi Yamba, yika pisu kem yi yo, dingin yo nyii yiri Bawei yei.

¹⁴ Yo yiri yiri, yi ko pero yi nyii seedaki bu kangga min Mbaate a tummuwe Bol yo ba yoo nere wu mir wei sima.

¹⁵ Kana we wu ce kin, Yesu twii Bol Yamba, a ninggu naapu kem yi Yamba, yika pisu kem yi yo.

¹⁶ Yo yir yiri, yi soma pero yi lee_jire_yi kangam Yambau_wu_juku_yirou.

Yamba twii kangam, kana we_wu_jukur kangam, a ninggu_pisu_naapu kem yi Yamba, Yamba yika kem yi yo.

¹⁷ Kangam yoo_cimacima a cudi_yiri palaka yi nuu_ya gwasi_a nyanggu_ku Yamba ning wei_balu, dingin yi ninggu_pisu_naapu yi yo a pina_sima binaa, cika ku Masiya yi tonou.

¹⁸ Kana we_wu Yamba kangne_yaa gwasi Yamba. Anda kangam wu cimacima keeri_siyau gwasi, dingin ka ner nuugu_gwasu_a gwasugu_tijgu_kuulu_a nyanggu_balu. Nere_wu nuu_gwasi kangam you_yaa cimacima.

¹⁹ Yi jukur kangam dingin Yamba kang yiro gawuriyo.

²⁰ Kana we_wu ce_kin, yo_kangman Yamba, anda kwaa bagon_yo_wu ponggu_yoogi_baleendo. Dingin kana we_wu kangman bu bagon_yo_wu kogu, na puu kangman Yamba wu yaa kogu.

²¹ Teeri du Masiya nyii_yiro twii, kana we_wu kangman Yamba, tagi_ba kangman bagon_yo_mwaasi.

5

Gwalgu dimbiri sima

¹ Kana we_wu lee_kin, Yesu wii Masiya, twii bol Yamba, kana we_wu kangman Mbaate_kangman Bol_yo_mwaasi.

² Tina kanda ku yi soma min yi kangman kwaraa Yamba wa, a bonggo_kangman Yamba yi pongondi_yi teering_yei.

³ Ka yi kangman Yamba yi ning pongondi yi teering yei. Pero teering yei yaa buu.

⁴ Kana we wu twii bol Yamba a gwala dimbir wurangi tu bwii tu simai. Wunaa dimbiri wu gwala dimbir sima, twii leegu jire yiru.

⁵ Wu gwalu wei dimbir sima we? Kopo nere wu lee jire kin, Yesu twii Bol Yamba.

Seedaki a dwii Yesu Masiya

⁶ Nuwa juku Yesu Masiya twii Bol Yamba, bonggo batisima yo yi gundu pero yi pargu siyei tiima ya a yeu, yaa bonggo gundu yi wundu tibak, anda kem yi gundu yi tiima. Bawei mwaasi a nyii seedaki too woo too jire, dingin twii Bawei du jire.

⁷ Woo yi seedakindi kunong bu nyii seedaki kin Yesu twii Bol Yamba.

⁸ Bawei, yi gundu, yi tiima pma nyii seedaki wiino.

⁹ Yi lee yi seedaki nuwa, anda seedaki Yamba a gwala mwa mwa, too seedaki wu Yamba nyiia a dwii Bol yei.

¹⁰ Kana we wu lee jire yi Bol Yamba woo yi woo seedaki a miringgi gaangu you, anda pma bu lee bu jire yi Yamba, a de twii baleendo, dingin yaa ku lee jire yi yiri tu Yamba ce a dwii Bol yei.

¹¹ Seedaki wii kin, Yamba nyii yir piima bu yaa matirwa, piima binaa a miringgi Bol yei.

¹² Kana we wu woo yi Bwiya woo yi piima, anda kana we wu yaa Bol Yamba yaa piima.

Piima bu yaa matirwa

¹³ N bala mbira tina yiri, mba bu lee jire yi Bol Yamba wa, palaka bu soma min, bu boo yi piima bu yaa matirwa.

14 Yi tĩn tiyendi a gawur Yamba yaa gwasi dingingi yi soma min nuu yiri ka yi sengg kana ca cuungi dangandi yei.

15 Yake ku yi soma min nuu yiri ko, yi soma min yo nyii yir kana ca tu yi senggo.

16 Ka kana we kwee bagon yo ninggu welem wu yinnibu boori ne, ba ce kuru a bonggo Yamba pero yo nyii wei piima pma bu ninga welem wu yinnibu booru. Anda pma bu welem pmau yinno booru, n ce bu min bu ce kuru dingingi koo duu nuwau.

17 Ninggu kana ca tu bwii twii welem, anda woo yi welem wu yinnibu boore.

18 Yi soma min kana we wu twii bol Yamba, yaa jee gawuri yi ninggu welem, dingingi Bol Yamba sweri pma, palaka Balaa Buwai ba mwani ya yo.

19 Yi soma min yi kwaraa Yamba wa, kana ku sima binaa a wai Balaa Buwai.

20 Yi soma min Bol Yamba a baa a nyii yir somandi dingingi yi som Yamba, yo wu twii jire. Yo mwa yi boo ning naapu yi yo wu twii jire, pero yi boo ning naapu yi Bol yo Yesu Masiya. Yo twii Yamba wu jire pero yi piima bu yaa matirwa.

21 Kwaraa muwa, bu ta dwii mbiri kundi bu cwaa kana ca tu demanu wei gaangu mbiru a bonggo Yambau.

Waja

Part of the New Testament in the Waja language of Nigerea

copyright © 2024 The Seed Company in collaboration with Language Developers and Bible Translators Association

Language: (Waja)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

bc61fc0a-b349-5328-9699-9f7ae5bceaa7